

TATA PANGIBADAH MINGGU BIASA - GKJ AMBARRUKMA

21 September 2025

Gedung Induk Papringan, jam 08.00 WIB

Pepanthan Nologaten, jam 08.00 WIB

(Warni Liturgis: Ijem, Stola/Logo/Simbol : Prau+Peksi Dara+Pelangi)

1. **Pacawisan** : Imam mimpin pandonga ing konsistori
2. **Liturgos** :

*Sakderengipun pangibadah kawiwatan,
Liturgos nyumet 1 (satunggal) lilin pethak ibadah.*

Liturgos : “Pasamuwan kinasih kagunganipun Gusti Yesus Kristus, Pradataning Pasamuwan GKJ Ambarrukma ngaturaken sugeng rawuh, sugeng enjang, lan sugeng pepanggihan malih wonten ing pangibadah **Minggu Selikur September Kalih Ewu Selangkung (Selawe)** (21 September 2025).

Sumangga kita sami atur uluk salam namaste utawi kanthi jawat asta kagem pasamuwan ing sakiwa tengen, ngajeng, saha wingking panjenengan. Berkah kabingahan, karaharjan, saha tentrem rahayu tansah nyarengi kita sami.

Kula nyuwun kawigatosanipun sawetawis, awit wontenipun pawartos Minggu menika, ingkang badhé kula aturaken sapérangan (*maosaken pawartos*).

Jangkeping pawartos saged kawaos lumantar pawartos *online* ingkang saged dipun undhuh mawi *QR code* ingkang sampun kacawisaken wonten ing layar monitor, punapa ingkang sampun kacawisaken wonten grup Whatsapp, menapa déné lumantar iber-iber cetak ingkang kacawisaken wonten ing kori greja.

Pasamuwan ingkang dipun kasihi dening Gusti, pangibadah wekdal punika kanthi irah-irahan “**Gesang ingkang Mursid**” badhe kaladosaken dening Bapa/Ibu Pandhita

Sumangga kita puji asmanipun Gusti kanthi repening kidung pambuka **Kidung Pasamuwan Jawi Tiga Likur, pada Setunggal lan Tiga (KPJ 23 : 1 + 3), “Puji Mring Allah”** *pasamuwan kasuwun jumeneng*

- (1) Puji mring Allah, Pangeran Kang Mahawisesa.
Muji ramya, binarung lan sawernining gangsa.
Pangidungnya klayan bingah ing manah,
nggunggung Gustining pratitah.

- (3) Puji mring Allah kang sung tentrem-raharja nyata.
tansah ngganjar begja mring tyang kang sèstu pracaya.
dadya dilah, andel-andel satuhu.
Pujinen lan trusing kalbu!

(Kidung kawiwitan, Imam lan Pengkhotbah lumebet dhumateng altar, Imam ngaturaken Kitab Suci dhumateng Pengkhotbah, sakderengipun Pengkhotbah mapan dhateng mimbar)

3. **Votum tuwin Salam Karaharjan:**

(Pasamuwan Jumeneng)

- Pandhita : Pasamuwan kinasih, sumangga ing pangibadah dinten Minggu punika kita sesarengan mratelakaken pangaken konjuk Gusti ingkang mekaten:
- Sadaya : **Pitulungan kita punika pinangkanipun saking Sang Yehuwah ingkang nitahaken langit lan bumi, tuwin ingkang mboten nate nilaraken pakaryaning Astanipun.**
- Pandhita : Sih rahmat lan tentrem rahayu saking Sang Yehuwah Gusti kita, tuwin Gusti Yesus wonten ing bapak, ibu, sadherek lan lare-lare sadaya.
- Pasamuwan : **Mekaten ugi ing panjenengan.**
- Sadaya : **5 7 i . / 5 7 i . / 5 4 3 . /**
Amin, Amin, Amin.

(Liturgos: Pasamuwan kula aturi lenggah.....)

4. **Sabda Introitus**

- Lektor** : Introitus kapethik saking **2 Petrus 1 : 3-4**
- Lektor** : “Mekaten sabdanipun Gusti”
- Pasamuwan** : “Puji sokur konjuk Gusti”

5. **Liturgos** : “Pasamuwan ing tetunggilanipun Gusti Yesus, Sabdanipun Gusti ndayani kita sami dados tetales ing gesang padintenan supados kita mboten kenging dayanipun hawa-nepsu kadonyan.

Sumangga sesarengan kita repenaken kidung sukarena **Kidung Pasamuwan Kristen Anyar Suwidak Kalih, pada Setunggal lan Sekawan (KPKA 62 : 1 + 4), “Karahayoning Tyang Mursid”**

- (1) Rahayu wong wedi asih mring Pangeran Yehuwah
rameng gawe sepi pamrih kasengsem sabdeng Allah
wong bener wah ngabekti slamanya den berkahi lan turune lestari.

- (4) Wong awatak welas asih mring kang miskin wah ringkih,
kanggonan kamulyan yekti nggih kamulyaning budi,
wong duraka mung meri ngangah-angah ing pati, pituwase bilai.

6. Pendeta : Sabda Andharaning Katresnan (Mulad Sarira) : Lukas 10 : 27

7. Pacawisan Pamratobat

Imam : ”Pasamuwan ingkang dipun tresnani Gusti, sesarengan kita badhe nyawisaken manah, murwakani pandonga pamratobat, kanthi memuji **Kidung Pasamuwan Jawi Sekawan Dasa Gangsal, pada Setunggal lan Kalih (KPJ 45 : 1 + 2), “Aneng Ngarsane Gusti”**

- (1) Aneng ngarsane Gusti,
binuka isining kalbu.
Sanyata najis uripku,
aneng ngarsane Gusti.

- (2) Anêng ngarsané Gusti,
tansah tetéla luputku.
Mung kebak lamis uripku,
anèng ngarsané Gusti.

8. Pandonga Pamratobat

Imam : “Pasamuwan ingkang sampun dipun tunggil ing padalemanipun Gusti, sesarengan kita aturaken pandonga pamratobat, kita ndedonga:

“Pinuji-pujia Paduka Gusti. Gusti ingkang kawula puji lan sembah ing asmanipun Gusti Yesus Kristus. Puji panuwun sokur konjuk dumateng Paduka. Gusti ingkang dados pangungsen kawula. Ing wekdal pangibadah menika Gusti, kanthi raos keduwung lan nglenggana awit kawula menika tiyang ingkang ringkih lan kebak ing jembering dosa. Kawula nyuwun apunten Gusti, awit sedaya pandamel dosa kawula menika. Pepadhang saha panuntuning Sang Roh Suci keparenga nyarengi anggen kawula sami nglajengaken gesang. Matemah kawula tansah saget mudi dhawuh Paduka. Linambaran sih lan pangurbananipun Gusti Yesus Kristus Juru Wilujeng ingkang sejatos, kawula ndedonga. Amin.”

9. Pandhita : Pawartos Sih-Rahmat : Jabur 37 : 18

Pangatah-atag Gesang Anyar : 2 Petrus 1 : 5-8

10. Kidung Kasanggeman

Liturgos : “Pasamuwan kagunganipun Gusti. Gusti Allah sampun paring pitedah supados kita sami tansah kadunungan katresnan lajeng saget ngedalaken wohing katresnan anggen kita wanuh dumateng Gusti Yesus Kristus.

Pramila sumangga kita saget ngaturaken wangsulan kanthi sesarengan ngrepekaken **Kidung Pasamuwan Jawi Sangang Dasa Pitu, pada Setunggal lan Kalih (KPJ 97 : 1 + 2), “Uwal Sing Laknat”..... pasamuwan kula aturi jumeneng**

- (1) Uwal sing laknat; iba begjaku! Gusti wus seda,
mbirat dosaku, temah luwar sing paukuman,
denya ngluwar babar pisan.
Refr:
Babar pisan dennya nulungi, babarpisan dennya ngrampung.
Rumaketa ing pamenthangan, mesthi luwar babarpisan.
- (2) Saiki kita padha mardika, Gusti wus nanggél ing slamet kita,
linuputken sing karusakan, sinucèkken babar-pisan,.....Refr:

(Liturgos : *Pasamuwan kula aturi lenggah.....*)

11. Wedharing Sabdanipun Gusti

(*Pasamuwan Lenggah*)

- a) Pandhita : Pandonga Epiklese
- b) Pandhita : maosaken 1 Timotius 2 : 1-7
- c) Pandhita : **Rahayu saben tiyang ingkang mirengaken sabdanipun Gusti lan nindhakaken karsanipun Gusti ing gesang padintenan. Haleluya.**
Pasamuwan: 1 1 | 3 3 0 3 3 | 5 5 0 5 5 | 6 . 5 4 3 |
Hale - luya Hale - luya Hale - lu - ya
- d) Pandhita : Paladosan Khotbah
- e) Irah-irahan: “Gesang ingkang Mursid”
- f) Ancas : **Pasamuan ngraosaken bilih gesang sesarengan ing sosial masyarakat menika saking kamursidan, tansah nggatosaken tiyang ingkang sekeng saha ringkih ugi tiyang ingkang nggadahi kabetahan khusus lan nggadahi krentek ngrangkul ing pasederekan tumrap sedherek kita punika.**
- g) **Wekdal Ening.**

12. Pisungsung

Imam : “Pasamuwan ingkang dipun kanthi Gusti, berkah tuwin kamirahanipun Gusti tansah linuber kababar ing gesang kita sami. Pramila, kita badhe caos pisungsung minangka cihnane raos sokur kita kagem Gusti.

Pisungsung wekdal menika kapantha dados tigang kanthong, kanthong setunggal kagem pasamuwan, kanthong kalih kagem kesaksian pelayanan, lan kanthong tiga kagem panyengkuyung dana griya éméritus. Pisungsung mirungan saged dipun lebetaken ing kotak ingkang sampun kacawisaken. Lan ingkang ngersakaken caos pisungsung kanthi migunakaken aplikasi m-banking, sumangga saged mawi scan kode QRIS ingkang sampun cumawis, katèmpèl wonten palenggahan.

Tetales pisungsung kapethik saking kitab **Jabur bab Satus Sekawan Dasa Sanga ayat Satunggal (Jabur 149: 1)** ingkang mekaten suraosipun:

“Haleluya! Padha ngrepekna kekidungan anyar kagem Pangeran Yehuwah! Panjenengane saosana puji ana ing pasamuwane para wong mursid.”

Kita aturaken pisungsung wonten ngarsanipun Gusti, kanthi repening pepujen
Kidung Pasamuwan Jawi Satus Seket Sekawan, pada Setunggal lan Kalih (KPJ 154 : 1 lan 2), “Adrenging Tyas Kula”

- (1) Adrenging tyas kula, ngaturken panuwun, Gusti.
Paduka ngasihi, kula kagunganta.
Refr:
Mung punika Gusti, pisungsung kula sawetahing gesang,
jiwa lan raga, wit kula tan darbe bandha kang pengaji
kang langkung prayogi, sinaos Gusti.
Mung punika Gusti, panyuwun kula, mugi katampia
atur kawula, mrih gesang kawula kagama Paduka pirantos sapala.
- (2) Saiba endahing sih-tresna Paduka, Gusti;
kula kagunganta, Paduka rimati.....Refr:

13. Pandhita : Pandonga Syukur lan Syafaat

14. Liturgos : “Bapak, Ibu, lan Sedhèrèk kinasih ing Gusti Yesus Kristus, sumangga sesarengan kaliyan tiyang pitados ing pundi-pundi papan, kita sami nélakaken **Pangaken Pitados Rasuli**. Pasamuwan kula suwun jumeneng

- Kawula pitados dhateng Allah Sang Rama, ingkang Mahakawasa, ingkang nitahaken langit kaliyan bumi.
- Inggih pitados dhateng Yesus Kristus ingkang Putra ontang-anting, Gusti kawula.
- Inggih kabobotaken dening Roh Suci, miyos saking prawan Maryam.
- Inggih nandhang sangsara nalika jumenengipun Pontius Pilatus, kasalib, nglampahi seda, lajeng kasarekaken, tumedhak dhateng ing teleng palimengan.
- Inggih tigang dintenipun wungu malih saking antawisipun tiyang pejah.
- Lajeng sumengka dhateng ing swarga, pinarak wonten ing tengenipun Allah Sang Rama ingkang mahakawasa,
- Saking ngriku inggih badhe rawuhipun ngadili tiyang ingkang gesang kaliyan ingkang pejah.
- Kawula pitados dhateng Roh Suci.
- Kawula pitados wontenipun pasamuwan Kristen satunggal ingkang suci sarta wradin, inggih patunggilanipun para suci.
- Punapa-dene pangapuntening dosa.
- Tanginipun raga.
- Sarta gesang langgeng.

15. Pandhita : Paladosan Berkah

16. **Liturgos** : “Pradataning Pasamuwan ngaturaken panuwun awit peladosanipun Bapa/Ibu Pandhita lan sadaya paraga ingkang sampun nyengkuyung lampahing pangibadah Minggu punika, ugi pasamuwan ingkang rawuh lan nderek ing pangibadah.

Pasamuwan ingkang dipun tresnani Gusti, sumangga kita sami saget nglajengaken gesang ing satengahing masyarakat kanthi mbudidaya kamursidan tansah nggatosaken tiyang ingkang sekeng saha ringkih, ugi tiyang ingkang nggadahi kabetahan khusus, lan nggadahi krentek ngrangkul ing pasederekan tumrap sedherek kita punika.

Sesarengan kita pungkasi pangibadah punika kanthi repening **Kidung Pasamuwan Jawi Sekawan Atus Pitulas, pada Setunggal lan Kalih (KPJ 417 : 1 + 2), “Sauruting Laku”**

- (1) Sauruting laku kang dakalami,
Gusti tansah tindak ngrumiyini.
Mula kang dadi osik ing atiku,
"Gustiku sèstu setya tuhu!"

Refr:

Salakuku Gusti datan négakken,
klayan setya dènira angreksa.
Ing wusanané, Gusti marengaken
aku ndhèrèk ing kamulyan swarga.

- (2) Ing nalika imanku wiwit goyah,
yèn tansah nyipati kang gumelar,
sanalika aku énggal gumrégah,
wit Gusti nora bakal nilar.....Refr:

17. **Liturgos** : “Mekaten lampahing pangibadah ing enjang menika sampun paripurna. Sugeng dinten Minggu, sugeng kondur, Gusti tansah paring berkah tumrap sedaya.”